



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 3



Jhingan nem AIFF Men's Footballer of the Year naroküm agütsü

Gauhati High Court-i Akhil Gogoi jaoker



VOL. XVIII NO. 278 (ADOK 278) DIMAPUR

YANGTEPNÜ (THURSDAY)

CHITENI (JULY) 22, 2021

₹ 5.00

COVID-19 Nagaland: 105 dak putet, 41 taneptsü angu & 3 asü

Kohima, July 21, 2021 (TYO): Bodbarnü Nagaland nung nisung 105 dak COVID-19 aliba putetogo aser parnok züngsema 26,943 kümogo.

"Tanü nisung 105 dak COVID-19 putet. Parnokji Dimapur nung 45, Kohima nung 37, Tuensang nung 10, Mokochung nung 8, Zunheboto nung 2 aser Longleng, Mon o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-ashi.

Maneni tanü COVID-19 puteta alir nisung 41 taneptsü angu. Parnokji Mokochung nung 14, Kohima nung 10, Dimapur nung 7, Tuensang nung 5, Kiphire nung 3 aser Longleng o Phek nung kaka (1) lir. Parnok züngsema taneptsü angur 24,434 kümogo" ta paisa ashi.

Nagaland nung COVID-19 nungi taneptsü angur 90.68% lir aser tang nisung 1,218 anepaludar, ta Dr Kikon-isa ashi.

Tanü Dimapur, Kohima aser Mokochung nung COVID-19 puteta alir nisung kaka asüba

züngsema tasür ajak agi 535 kümogo, saka nisung 14 bo tanga tashidak ajanga asü, ta paisa ashi.

Nagaland nung COVID-19 alitsü akok ta temolung melemi bilemba sample 2,50,113 tendangogo. RT-PCR ajanga 1,01,071, TrueNat ajanga 65,683 aser Rapid Antigen Test ajanga 83,359 tendang, ta Dr Kikon-isa metetdaksü.

Mongulbar tashi nung nisung 5,74,193 nem COVID-19 vaccine indang dose 6,99,630 agütsüogo, ta State Immunization Officer Dr Ritu Thurr-i ashi.

Vaccine agirtemji frontline workers 60,557, healthcare workers 15,933, arishi küm 45 ser temapur 1,76,333 aser arishi küm 18 nungi 44 tsüngda alir 3,21,370 lir, ta paisa ashi.

"Vaccine agirtem rongnung nisung 1,25,437-i dose ana agiogo. Parnokji frontline workers 35,940, healthcare workers 11,791, arishi küm 45 ser temapur 77,492 aser arishi küm 18 nungi 44 tsüngda alir 214 lir" ta Dr Thurr-isa metetdaksü.

Nagaland nung teyari mangutsüba aluyimer 524 nem Rs 45 lakh agütsü

Kohima, July 21, 2021 (TYO): PM-KISAN scheme kübok teyari mangutsüba sernung sen agütsüba aluyimer lakh 42.16 nungi Rs 2992.75 crore meyipa angutsü atema Centre sorkari mapa inyaker. Iba nung Nagaland state nungi teyari mangutsüba aluyimer 524 dena lir, ta Minister for Agriculture-i metetdaksü.

PM-KISAN scheme kübok sen agütsüba indang tasüngdangba ka langzüdang Minister for Agriculture, Narendra Singh Tomar-i iba osang metetdaksü.

July 15, 2021 tashi nung PM-KISAN scheme kübok ineligible farmers lakh 42.16 nem Rs 2,992 crore enoktsüba meyipa agütsüba osang liasü, ta paisa ashi.

Sen meyipa agütsüba rongnung Assam nungi aluyimer lakh 8.35 nungi Rs 554.01 crore,

Punjab nungi Rs 437.9 crore, Maharashtra nungi Rs 357.9 crore, Tamil Nadu nungi Rs 340.56 crore aser Uttar Pradesh nungi Rs 258.64 crore lir, ta Lok Sabha nung Union Minister Tomar-i ashi.

Sen meyipa angutsüba state tem rongnung Nagaland nungi ineligible framers 524 nungi Rs 45,08,000 dena lir.

PM-KISAN scheme ya 2019 küm tenzük aser iba ajanga teyari angutsüba aluyimer shia nem küm nung Rs 6,000 agütsür. Senji küm nung shilem asem (Rs 2,000) lemsar bank account nung indangindanga enoktsür.

May 14, 2021 nü Pradhan Mantri Kisan Samman Nidhi (PM-KISAN) scheme kübok Nagaland nung aluyimer 1,74,564 nem Rs. 35.62 crore agütsüogo.

Core Committee-i NNPGs & NSCN-IM na ajuru

Dimapur, July 21, 2021 (TYO): Naga yimten tebilemstü tekaratiba nung tatem küma tembangtetsü asoshi inyakba sentong ka nung Core Committee on Naga Political Issue purtemi yashi Mongolbar nü NNPGs aser tanü Bodbar nü NSCN-IM den senden menogo.

Tanü NSCN-IM den Chumukedima Police Complex nung amenba senden nung NSCN-IM nung tongti zülur aser parnok government nung ato kilonser Wb.Th Muivah-i anir dena liasü.

Iba senden temer külen osangbener den jembidang, "Core Committee-i NNPGs aser NSCN-IM teloktemi MLA 60 prongla den külemi senden ka amentsü imlar" ta Leader of Opposition aser Core Committee Co- Convenor, T.R. Zeliang-i ashi.

"Core Committee-isa NSCN-IM dang India sorkar den olemtep tenzükshitsü mepishiogo. Onoki tiyongtsü nung inyakerama yariteptsü aser külem tangatetba nung noktaker telok ajaki India sorkar den jembia telemetba ka agütsü imlar" ta paisa ashi.

"Covid-19 wara ajanga mapang talangka lir tanü NSCN-IM lennirtem den ajurutepogo. Onok kanga junga sensaksemogo aser kati ka tebilembatem angatetepogo" ta Zeliang-isa ashi.

NPF-i PDA sorkar nung adentsü indang jembiba atema

osangbenertemi asüngdangdang, "Onoki opposition maliba sorkar indang tangatetba molunga agizükogo. NPF yabo party ka dang saka PDA nung party ana-NDPP aser BJP lir anungji parnoki dang telemetba agütsü" ta TR Zeliang-i langzü.

Nagaland BJP MLA temi BJP Nagaland incharge Nalim S Kholi den senden ka amentsü. Paisa Nagaland chief minister Neiphiu Rio den ajuruteptsü akok.

Assembly nung ruling aser opposition party tem külemi longjemmer saka Assembly kima nungbo onok tangatetba balala asütsü. Onoki menden atema masü, saka sorkar den külemi denra Framework Agreement ama nung sign sütettsü, ta Zeliang-isa metetdaksü.

Pa chief minister inyakdang opposition maliasü aser iba mapang India sorkar aser NSCN-IM tsüngda Framework Agreement nung sign sütep ta paisa ashi.

Onok külemi longjemmer inyakra India sorkari tashi angatsü aser iba tangatetba nung onoki opposition maliba sorkar tangatetba molunga agizük, ta TR Zeliang-isa metetdaksü.

Nagaland chief minister aser Core Committee convenor Neiphiu Rio aser NSCN-IM lennirtemibo tanü osangbener den mejembi.

Core Committee-i NNPGs Den Ajurutep: Mongulbarnü Niathu Resort

nung CCoNPI-isa NNPGs indang Working Committee den senden ka menogo.

Iba Senden temer osangbenertem den jembidang Working Committee Convenor, NNPGs N Kitovi Zhimomi-i senden junga agiba osang agiogo ta metetdaksü.

"Tanga atemabo terata kecha mali. Naga khuret ya India sorkar ket nung lir aser onoki India sorkar den mangatetep ajak angatetepogo, anungji Naga nung tsüngda meputep adoktsü nüngdak mali" ta Kitovi-isa ashi.

NNPGs-i NSCN (I-M) den külemi senden amentsü sentong lir mali ta osangbeneri asüngdangdang "India sorkari kodang kulikaket nung sign asütsü atema jaokdir, idangji onok külemi amentsü kechiyong tenangzüktep ka dang asütsü" ta Kitovi-i langzü.

"Telok ajak longjemmer külemi inyaka aotsü atema CCoNPI-i khurettem aser tetsükdaksütem angatettsü meranger" ta chief minister Neiphiu Rio-ia ashi.

Deputy CMY Patton-ia "India sorkari telemetba ka dang agütsü ta shiogo anungji Naga yimten telok ajk longjemtsü mepishir" ta ashi.

"Core Committee kübok MLA ajak denogo anungji tang asenok ajak longjemmer yimten tekaratiba nung latettsü atema külemi inyaksüla" ta NPF lennir TR Zeliang-ia ashi.

Nagaland nung MLA 60 prongla anentsüla: NPCC

OPPOSITION MALIBA SORKAR AJANGA TETSÜKDAKSÜ BENTSÜR ARÜTSÜ

Dimapur, July 20, 2021 (TYO): Nübertem ashioktsütsü memerangi Nagaland Legislative Assembly nung MLA ajak anentsüla ta Nagaland Pradesh Congress Committee (NPCC)-i metetdaksüogo.

"NPF-i PDA teloktep nung adentsü lemetetba nung taoktsü kecha mali kechiyong tesüiba ita 40 tsüngda NLA nung MLA 26 (tang 25) aliba opposition party ya ola maliba opposition ka süogo. Ajisiuaka, parnoki Naga yimten tebilemstü tatemtsü amer opposition maliba sorkar ka akümtsü ta asüba ya Naga nung mezüngmeshiba mapa ka lir," ta Communication Dept, NPCC sangdong ka nung metetdaksü.

NPF-i 2018 assembly elections nung Hindutva anema ta ser toktepba ajanga menden 26 nung takok angu. Iba mapang nungi parnoki BJP den tesentaktep ayuba aser 2003 nungi 2018 tashi DAN teloktep nung BJP dendaksüba nisungtemi mama lir. 2018 nung parnoki Nagaland nung BJP den tesentaktep pilaaka, March 2017 nungi parnoki Manipur nung BJP den tesentaktep yur inyaksangshia aruba ajanga tarak keta lir. Anungji parnoki BJP aser NDPP den tesentaktep ayutsü lenmang lapoktsübaji Hindutva politics dang parnok yokdokba lir, ta NPCC-isa ashi.

Nagaland nung BJP, NDPP aser

NPF-i Naga yimten latettsü asoshi mapang atsülangtsü aser Hindutva politics ajungkettsü meranger, aser külen Congress-i Naga yimten latettsü aser kechi südir süaka secularism mesamadaksütsü atema noktaker, ta parnokisa metetdaksü.

"Tang mapang ya opposition maliba sorkar ka akümba ajanga tajangzük mangutsü saka iba ajanga Naga yimten latetba maparen nung tetsükdaksü bentsür arütsü. Anungji NLA nung MLA 60 pronglai Naga yimten latettsü atema nendaka bilemer süra, nübertem mashioktsü tangsa MLA menden nungi anentsüla" ta NPCC-isa metetdaksü.

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nung ama melentepa tamshi. Mozü achitsü agüja lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim



NDPP Youth ajanga Clean Kohima campaign tenzük



Advisor Imnatiba, Dr Neikiesalie aser Zale Neikha nungertem July 21, 2021 nü NDPP Youth Clean campaign tenzükba mapang tangokba noksa nung angur.

Kohima, Chiteni/July 21 (TYO): Nationalist Democratic Progressive Party (NDPP) Central Youth Organisation ajanga July 21, 2021 nü Clean Kohima campaign tenzükogo.

Advisor, Industries & Commerce, Imnatiba, shiba NDPP Youth indang in-charge lir, pai iba sentong ya Old MLA Hostel lemjem nung tenzüksü, kong Advisor, Urban Development and Municipal Affairs, Dr Neikiesalie Kire aser Advisor, Youth Resources and Sports, Zale Neikha nungertema dena liasü.

Sentong nung Imnatiba-i o tatsüka jembiba mapang, tashidak wara mechi tang nisung meimchir atema tammang mapang ka lir aser yangji libajen müreka ayutsü nüngdaker, ta ashi.

Tang tashidak wara agi sünger aliba mapang asenoki maneni mürekmeju mapa inyaksüla aser asen ki aser colony nung mesen tepsetba mozü akhatsüla, ta pai ashi.

NDPP Youth ajanga Public Health Engineering Department den lungjemer mürekmejuba sentong ayongzükba atema pai tenüngsang agütsür aser nübur ajunga dang iba maparen nung shilem agitsü ayongzükba liasü.

PHED nung WSSO HRD consultant, Thenusou Sekhose-i ashiba agi, Swacch Bharat mapa kuma inyaksü atema PHED ajanga tongti shilem agir aser India nüjso ngur küm 75 ajungba nüngtem nung Ato Kilonser Narendra Modi-i "Azadi Ka Amrit Mohatsav" ayongzükba den putepa inyaker.

Iba dak sendakba nung sentong balala ayongzükba agiogo aser ano PHED ajanga maparen balala ayongzükba agitsü aser yangji August 15, 2023 tashi state tesem ajungalen mürekmejuba yimya ajungketsü asoshi lokti sentong dena lir, ta lai ashi.

Nagaland kübok yimtsüngtem nung Open Defecation Free (ODF) jenjang

ya 2018 küm ajak teyaritep nung ngutet, saka tang state-i ODF plus jenjang ngutettsü asoshi merangtsüla, kechiaser tashidak wara agi tesem ajunga sünger lia mürekmejuba ajanga tongti shilem agir, ta laisa ashi.

Sentong nung NDPP Youth President Kelhouneizo Yhome-i ashiba agi, temang anema alitsü atema mürekmejuba ya kanga tongtipang lir aser NDPP Youth-i iba sentong ya ajanga Kohima kisung nung masü saka state kübok tesem balala nunga rangloksü. Nagaland müreksü asoshi ibai tetenzüker alitsü, ta pai ashi.

Iba campaign ya CRPF Camp, Lerie nungi Old MLA Hostel tashi Southern Angami-I & II ajanga ayongzük, Police Check Gate nungi Old MLA Hostel tashi Western Angami; Tinpatti Junction-D Block-Old MLA tsungta 9-Kohima Town aser Tinpatti junction-Sonürü-CM Bungalow tashi Northern Angami-I & II ajanga müreka jaja.

FAC nung Google Workspace atema anogo trok training agi

Dimapur, Chiteni/July 21 (TYO): Systems & Information Committee, Fazl Ali College, Mokokchung ajanga July 12 nungi July 17, 2021 anogo tashi "Google Workspace For Educational Institute Management & Tally Prime" indang training sentong ka ayongzükba liasü.

Iba sentong nung shisalen sayurtem ya college nung tesayurtem nungi Dr. Abhijit Borah, Physics Department; N John Kuotsu, Computer Science; Lanunungsang, Computer Science aser Dr.

Imlinichet Imchen, Economics Department nungertem liasü.

College staff tem computer amshia pei mapa tetsükdaktsü majurui inyaktettsü nükjidong nung iba training ya agüja liasü. GSuite/Google Workspace/Cloud Computing ya college nung tongtipang shilem ka lir, koba college ketdangtsüsü asoshi amshitsü.

Iba sentong kübok office staff ti shimteta anogo trok training anogoshi ghonda ana-na agüja liasü.

Iba training nung G Suite / Google Workplace (GMail/

Google Drive/Google Documents), Google Sheets, Admission Module of Fazl Ali College, Examination Module of Fazl Ali College aser Account Section Staff atema Tally (mandatory/exclusive) amala inyakyim sayua liasü.

Iba training nung adenertemi Email yoktsü, Documents lemsatsü, Tally amshia senotsü records tem bendena ayutsü, (non-fresh) Administration Online agitsü, Online ajanga examination Form Filling asoshi mechi training ya agüja liasü.



Asür tsürabur N.I Jamir kinungertemi Dr. Imkongliba Memorial District Hospital (IMDH) Mokokchung nem Maruti Suzuki Ecco gari ka den portable X-Ray machine ka tenla agütsüba mapang Mokokchung D.C Limawabang Jamir den Mokokchung C.M.O; Dr. Chubala, IMDH medical superintendent; Dr. Limatula aser IMDH nung inyaker doctor-tem kar densema noksa nung angur. Tsürabur N.I Jamir kinungertemi tang mapang kanga dang nungdakba gari ka den X-ray machine tenlaba asoshi Mokokchung District Task Force (DTF) aser district nübur ajak tenung nung Mokokchung D.C Limawabang Jamir-i item osettem agizüka jembidang pelaba lemsatep. Mokokchung, July 21, 2021

Rakzükratemer ka Mkg police-i apu

Mokokchung, July 21 (TYO): July 19 nü Mokokchung town tiyong nung memetetba nisung kari tashiyim agi sen saruba/rakzükratemer osang angashia idangjisa Mokokchung DEF special team-i mita aoba mapang rakzükratemer ka apu, ta Mokokchung Addl. SP aser PRO-i sangdong ka ajanga metetdaksü.

Iba dak sentakba nung arishi küm 44 tain Chami yimer asür Longritemjen jabaso Naga United Village, 4th Mile, Dimapur nung alir Meyiwapang (alias)/Wapangmeren apu. Asügangnya

asügang pua alisang jagi pa 2021 May ita NSCN (K/Niki) nung aden, ta ashi. Pai Mokokchung town nung dokan ana (2) nungi sen 11,000/- (meyi terka) rakzükratemer pai nangzükba liasü. Iba den külemi pa ket nungi sen meshiba aser tanga kakat kar ngutet, ta police osang ajangasa metetdaksü.

Iba dak sentakba nung Mokokchung PS-I nung case registered süogo aser iba keno tarokba bushisügang tenzükogo, ta Mokokchung Addl. SP & PRO-isa metetdaksü.

Lokti balalai HSLC & HSSLC 2021 tatidang nung takok angur nem tenüngsang agütsü

Kohima, Chiteni/July 21 (TYO): Nagaland Board of School Education (NBSE) ajanga agiba HSLC aser HSSLC examination 2021 nung takok anguba kaketshir ajak den tepela salem lemsateper, ta Naga Students Federation (NSF) ajanga sangdong ka nung ashi.

Iba tatidang indang osang ya July 20, 2021 nikongdang sangdong, aser HSLC nung takok angur ya shilem 69.42, Arts Stream nung takok angur shilem 69.37, Commerce Stream nung takok angur shilem 74.39 aser Science Stream nung takok angur shilem 91.35 liasü.

Tanüngba kaketshirtem dang tajungtiba nung takok angur nem tenüngsang alakteta agütsü, ta NSF ajanga ashi.

Nenoki meranga inyakba, bendanga agütsü nendaka azüngba ajanga takok anguba atema nüma tanga bilemer. Tarutsü wadang nung nenok asoshi tajungtiba moatsür, ta ashi.

Maneni NSF ajanga kaketshirtem dang meranga azüngba yimya sübatsü ajungshi aser tarutsü anogotem nung tang takok nguteter tem ya Naga nung asoshi rongsen ka ama alitsü imlar, ta ashi.

Tamakok anguba kaketshirtem danga taruba küm tajungtiba nung takok angutsü asoshi pei sasa pei dak tamang katettsü ayongzükba liasü.

Temolung ajema teli, meranga raring aser nenoki imlaba dang nungi tekeraba nung nenok dangi takok arutsü, ta NSF ajanga ayongzük.

National Students' Union of India (NSUI) Nagaland state ajanga HSLC aser HSSLC tatidang nung takok anguba kaketshirtem den tepela lemsatepa tenüngsang agütsü, aser ibai len tasen ka tetenzükdak lir, anungji jangrabangra tuluba nung mera agitsüla, ta ayongzük.

Union ajanga tamakok ngua aliba kaketshirtem danga taküm nai iba tatidang majangtetaka taruba

küm tajungtiba nung ajangtetsüsa tezü tanga melie meranga azüngtsü ajungshia liasü.

NBSE ajanga agiba HSLC aser HSSLC tatidang nung takok anguba kaketshir ajunga den tepela lemsateper, ta Dimapur Naga Students' Union (DNSU) sangdong ka ajanga ashi.

Yimya tasenba nung online ajanga angazükba nung kaketshirtemi yimya süpaba ngua pelar aser tejak tenteter, koba mapang talangka alitsü, kechiyong temelenshi ya paitoktetsü makok aser kasaji shisaliok ya lir, ta parnoki ashi.

Taküm iba tatidang nung takok monguteter asoshia süoki ia bilemstür. O agi nenok molung süngzüksütsü makok saka iba tezüdangtsü mapang yagi na yashi dang tashi taiba kuma nü takum wadang ajak nung takok angutsü imla atar, ta DNSU ajanga ashi.

Kasa mapang kaketshir dang meranga sayuba atema tesayur aser staff tem dang pelaba lemsateper.

Tatensa tsürabur ajanga dang tanur tejangraba nung yaritsü asoshi tali temolung agütsütsü ayongzük, ta parnokisa ashi.

Dimapur District Citizens' Forum-ia sangdong ka ajanga HSLC aser HSSLC examination 2021 nung state ajanga nungi aser talisa Dimapur nungi takok angur den pelaba lemsatepogo.

Tashidak wara agi tesem ajunga sünger timtem ajurua aliba mapang kaketshir shirnokisa bendanga agütsür meranga zünga takok ngutetogo, nenok ajak nem tenüngsang agütsür. Ajidang masü 2020-2021 academic session takok ngua tembangtetba atema NBSE, tesayur aser shilem balala agir ajak dang pelaba lemsateper, ta DDCF ajanga ashi.

Parnokisa tamakok ajurua aliba kaketshirtem dang temolung ajema malitsü aser tali meranga azüngtsü ayongzükba liasü.

FAC nung Google Workspace atema anogo trok training agi

Dimapur, Chiteni/July 21 (TYO): Systems & Information Committee, Fazl Ali College, Mokokchung ajanga July 12 nungi July 17, 2021 anogo tashi "Google Workspace For Educational Institute Management & Tally Prime" indang training sentong ka ayongzükba liasü.

Iba sentong nung shisalen sayurtem ya college nung tesayurtem nungi Dr. Abhijit Borah, Physics Department; N John Kuotsu, Computer Science; Lanunungsang, Computer Science aser Dr. Imlinichet Imchen, Economics Department nungertem liasü.

College staff tem computer amshia pei mapa tetsükdaktsü majurui inyaktettsü nükjidong nung iba training ya agüja liasü. GSuite/Google Workspace/Cloud Computing ya college nung


tongtipang shilem ka lir, koba college ketdangtsüsü asoshi amshitsü.

Iba sentong kübok office staff ti shimteta anogo trok training anogoshi ghonda ana-na agüja liasü.

Iba training nung G Suite / Google Workplace (GMail/Google Drive/Google Documents), Google Sheets, Admission Module of Fazl Ali College, Examination Module of Fazl Ali College aser Account Section Staff atema Tally (mandatory/exclusive) amala inyakyim sayua liasü.

Iba training nung adenertemi Email yoktsü, Documents lemsatsü, Tally amshia senotsü records tem bendena ayutsü, (non-fresh) Administration Online agitsü, Online ajanga examination Form Filling asoshi Google Workspace amshitettsü mechi training ya agüja liasü.

Arunachal Pradesh nung NSCN züngsem 2 temai adok



Dibrugarh, July 21, 2021 (Agencies): Arunachal Pradesh kübok Longding district nung NSCN telungpur ana temai adokogo. Tenaji NSCN (Khaplang) aser NSCN (Khang Konyak) nungi liasü aser Longding superintendent of police Vikram Harimohan Meena tsüngdang temai adok. NSCN (K2) züngsemji Hikai Wangsa (37) ta jangjaogo aser pa ya Longsom

nunger lir. Pai 2009 nung NSCN (K) nung aden aser 2019 nung NSCN (K2) nung aden. NSCN (K) züngsemji Jamgang Patadam (25) ta jangjaogo. Pa ya Khasa nunger lir. Pai December 2020 nung NSCN (K) nung aden. Temai adokba telungpurtem jagi tashiyim mapa inyak aser tax saru, ta police-i ashi. "NSCN züngsemtemi

Longding nung tashiyim agi sen saruba mapa inyak. Onoki Myanmar aser Arunachal Pradesh arrtsülen telungpurtem anema mapa inyaka arur. Onok indang intelligence nisungtemi kanga meranga mapa inyakdar" ta police-isa ashi. Arunachal Pradesh kübok Longding district-i Myanmar den arrtsüa lir aser iba ajanga telungpurtem India telung aiter.

Dehing Patkai National Park nung shidi ka khaset



Dibrugarh, July 21, 2021 (Agencies): Assam nung Dibrugarh district kübok aliba Dehing-Patkai National park nung süng auyartem aser forest guards tsüngda khatepdang shidi ka khaset.

Iba ya July 19 nü Assam-Arunachal Pradesh arrtsü anasa Basabnalla nung atalok. Mongulbar anepdang forest kettangsurtemi shidi tasümgangji angu.

angazük aser ibaji parnok tesem tonga ao. Idangji süng auyartem parnok dak injang khaloktsüba sülen parnok khatep. Iba mapangji süng atsütsü atema bener aruba shidi ka khaset" ta Divisional Forest Officer, Dibrugarh Pradipto Baruah-i ashi. "Süng auyartemji Arunachal Pradesh nung liasü aser parnok machine amshia süng atsünger. Assam forest nung

süng atsüngba nung NSCN-a adena lir. Onoki mapang shia n i s u n g t e m i mapang shia Assam li

"Onoki Mongulbarnü shidi atsünga agir dak post-mortem agiogo aser SOP nung aliba ama tasümgang endokogo" ta Baruah-isa ashi. Küm aika Arunachal Pradesh tsütsü nungi süng auyartem Assam tsütsü süng atsünger, ta environmentalist Mridu Paban Phukan-ia ashi.

"Onoki aiben iba osang sangoktsüogo saka iba khuret atema kecha meinyaker. Süng auyartem anüngdang machine bener Assam nung aremi arur. Assam-Arunachal Pradesh arrtsü anasa ozüngi memelaba sawmill aika lapoka lir" ta paisa ashi.

"Arunachal Pradesh nungi nisungtemi küm aika Assam ali atsünga agir, saka Assam sorkari iba atema mapa shitak meinyaker. Assam-Arunachal Pradesh arrtsü anasa arem tulu liasü saka tangbo auertem machine amshia süng atsüngba ajanga arem mali kümogo" ta Phukan-isa ashi.

Tripura sorkari mashisa tetsür nem Rs 2000 agütsütsü

Agartala, July 21, 2021 (Agencies): Tripura sorkari "Mukhyamantri Matripushti Uphar" scheme kübok mashisa tetsürtem indang bank account nung Rs 2000 agütsütsü telemtetba agiogo.

Tripura cabinet-i state nung mashisa tetsürtem nem Rs 2000 agütsütsü lemtetogo. Iba ya parnoki

mozü kidangi aodang aser chiyungtsü alidang amshitsü atema lir.

Iba scheme atema Rs 8 crore lezmüktsüogo, ta cabinet spokesperson & Tripura education minister Ratan Lal Nath-i ashi.

"Iba scheme ajanga state nung mashisa tetsür 32,000 shi ajangzüktsü" ta paisa ashi.

Meghalaya IED apokba nung HNLC overground worker 4 apu

Guwahati, July 21, 2021 (Agencies): Meghalaya kübok East Jaintia Hills district nung IED pokdaksüba atema Hynniewtrep National Liberation Council (HNLC) indang overground worker 4 puogo.

July 14 nü IED apokdang havildar ka yiru aser iba ya HNLC telungpurtemi pokdaksü ama temolung malemer.

"East Jaintia Hills District Police-i HNLC overground worker pezü puogo" ta Asstt Inspector General of Police (AIGP) G. K. Langrai-i ashi.

Parnok ajak gari ka nung amen aser iba sülen Police

Reserve nung IED yutsütsü ao, ta paisa ashi.

"July 13 aser 14 aonung parnoki IED pokdaksü aser idangji ki ka tera raksa aser police ka yiru" ta AIGP Langrai-isa ashi.

Police-isa HNLC züngsem ana puogo. Tena yagi 2019 nung HNLC wako atsüket aser Coke factory, Khliehriat nung IED ka pokdaksütsü merang.

"Iba ken o atema maneni bushisüngdang südar aser HNLC züngsemtem bushidar" ta paisa ashi.

Bodbarnü Police Reserve nung IED pokdaksüba dak sendakba nung HNLC züngsem ana pua lir.



July 21, 2021 nü Dibrugarh nung aliba Assam Medical College and Hospital (AMCH) nung doctor temi arishi küm 16 tain tetsür ka dak nungi seret 30 shi ovarian mass rangteta endokogo. Tetsürta temang ya kanga mejungi liasü saka senior VA Dr Karuna Das-i kanga dang meranga surgery takok ngua agiogo ta AMCH-i Twitter nung metetdaksü. (Dibrugarh, July 21)

Gauhati High Court-i Akhil Gogoi jaoker

Guwahati, July 21, 2021 (Agencies): Gauhati High Court Sibsagar MLA Akhil Gogoi dang hopta asem tsüngda okadaki arutsü atema tetuyuba agütsüogo.

National Investigation Agency (NIA)-i Chandmari ken o atema temepishiba ka agütsüba sülen GHC-i iba tetuyuba agütsü.

Special NIA court kati iba ken o nung Akhil Gogoi metenja

lir. Pa ya December 2019 nungi Unlawful Activities (Prevention) Act (UAPA), 1967 kübok tai tonglokja tepuokdak ayu.

Ajisüaka, July 7 nü NIA-i Gauhati HC nung special NIA court-i obendang agütsüba anema temepishiba ka benok.

"Iba timtem ya ajurutsü imlaa dang lir aser tarutsü anogotem Supreme Court tashi aotsü akok" ta Akhil Gogoi atema lawyer Krishna Gogoi-i ashi.

Mizoram nung nisung 725 dak Covid19 putet

Aizawl, July 21, 2021 (Agencies): Mizoram nung nisung aika dak COVID-19 puteter aser taoba ghonda 24 tsüngda nisung 725 dak putetogo.

Nisung 725 rongnung Aizawl Municipal Corporation (AMC) kübok tesem 6 nung mass testing drive alidang nisung 111 dak putetba dena lir. Parnok züngsema nisung ajak agi 29,020 kümogo ta health kettangsur kati ashi. Taoba ghonda 24 tsüngda

COVID-19 aliba puteterterem rongnung tanur 138 dena lir, ta paisa ashi.

Mizoram nung tang nisung 6,833 anepaludar aser 22,061 taneptsü nguogo.

Külen, Mizoram nung Covid19 puteta alir nisung 126 süogo.

"Mongulbar tashi nung nisung lakh 6.11 tema nem vaccine agütsüogo" ta state immunisation officer Dr. Lalzawmi-ia ashi.

DIMAPUR MISSION HR. SEC. SCHOOL

Churches Colony, Near City Tower. Dimapur - 797112, Nagaland.

Email: dmhssdim@gmail.com

Website: WWW.dimapurmissionhrsecschool.com

ADMISSION NOTICE

FOR CLASS-XI ARTS 2021-22 (BOYS & GIRLS)

Admission forms & prospectus are available at the school office on all working days (9:00 AM to 1:00PM).

Special Features:-

- ❖ Special remedial classes.
- ❖ Spiritual retreat and counseling and career guidance.
- ❖ Transportation and generator facilities.
- ❖ Well qualified and experienced subject teachers.
- ❖ Excellent HSLC and HSSLC results.

Admission will be given on merit and first come first basis.



TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 22, 2021

Nagaland asoshi osang tajung

Osang tajung kangabo mangashidak, asen lima nung asenok ajak asoshi osang tajung kaji taküm 2021 küm Nagaland Board of School Education-i agiba class ter aser terana tatidang nung government school-tem nungi kaketshirtemi private school-tem den toktepa takok tajung anguba ya asütsü. Aji oda, taküm NBSE ajanga agiba class 10 tatidang nung tatidang agütsürtem kaketshir ajak takok anguba (100% qualified) kaketreju 120 rongnung kaketreju 25 bo government school-tem liasü aser ano class 12 nunga government higher secondary school nungi tematiba takok angurtem (toppers) rongnung asem dena liasü. Ano, tangar ajak dak alaka Mokokchung asoshi osang tajung kaji, takok tajung angur government school-tem rongnung Mokokchung district nungisa kaketrejua teimba aser kaketshirtema teimba takok tajungba nguogo. Atangji, private school-tem nung azüngertemia takok tajung nguogo, saka government school nung azüngertemi anguba takokjisa balaka aser tajungba ama nisungtemi agizüker, kechiyong kechikomaka ser, Nagaland nung government school-tem ya school masü ama kuma aoba ajanga tanurtem aika kaketshisatsü shitak mengutet taküm raksaba otsü agi Nagaland temulung shiranga lir. Nagaland dak tajung kecha mali, aji Nagaland majungba agi masü saka Nagaland nung alir Naga nung majungba agi, anungji Nagaland tajungba kuma yanglushitsü asoshi tesem ka nungibosa tenzüksüla aser iba tesemji government school-tem ya asütsü. Atangji, government school-tem mejungaka private school-tem lir, aji saka Naga nung tanurtem aika asoshi private school-temji government school melena amato kumer mezüngtetsü, kechiyong private school-temji sen agüja azungba school-tem saka government school-temjibo angati kaketshisatsü shitak aser tajung agütsütsü asoshi government-i lapokbatem lir. Aji oda, kaketshisatsü tajung angutsüba maongkaji takar asoshi dang masü saka takar sensaker kecha mali, ajak nem kasasa kaketshisatsü agütsütsübaji government teinyaktsü tongtibangtem rongnung tongtibangtiba lir. Tanü asen lima nung zünger mapa manguba tebilemtsü ya shitakbabo kaketshisatsü shitak ngua tazungdak kaketreju tajung maliba tebilemtsü nungi adokba tebilemtsü lir, kechiyong kaketreju tajung nung azüngertem asoshibo zünger mapa manguba tebilemtsü masü saka zünger mapa inyaker meinyakma reprangtetba aser anguba tebilemtsüang ajurutsü. Aji oda, küm aika sülen taküm 2021 küm asen Ao lima nungi tenzüker government school-tem nungi kaketshir aikati class ter tatidang nung takok tajung angubaji asen lima yanglushi tenzüker asütsü. Asenoki jungjunga anguoka reprangdanga, Nagaland nung government school majungtsübaji kecha kuli mali, kechiyong government school ajak nung tazung temetetter sempet aketer lanurtem agi tua tesayur tajung peria lir aser kaketrejutem anepalutsü asoshi Communitisation sentong ajanga telidak pur yimten yimsüsürtem nem government-i tashi agüja lir. Ajisüaka, asenoki sen meindoki asen chirnurtem züngdaksütsüba government school ajungtsü atema temulung magütsüba agi, asen meyong kaketreju ser nung kibur maliba kaktetreju ama kümdaktsür. Itemji shia arudaktsütsüla. Maka ser nung mekoksümonga asen chirnurtem fee agütsüba private school nung züngdaksü dang aiben asenok maksü aser parnok tamakok ajurur. Ibaji asensasa asen timtemi aiba mapa ka lir. Joko, asenoka asensasa külakoktsüba mapatem nungi nüchi akümtsüla aser government school ya asen school ta bilema züngzünga anepalutsüla. Item nungdakji tajungba rajema, government nung School Education department nung tuluba nungi tenzüker aluagi school shia nung tesayurtemi tesayur mapaji 'missionary' mapa ama bilema kanga temulung agüja inyaktsüla. Asen taküm nung anepdang shia tanurtemi salem shia akhüm agütsüba aser asenoki tanur taküm agi alima asoshi senso tajung kuma yanglutsüba temoatsü aser tepela amabo kong nungia mangutsü.

OLEMSABANG

COVID-19 VACCINE; TASEMBUBA TZÜSEM ATEMA TETZÜDANGTI

~ Sentilong Ozükum

Taruba ita-tem nung COVID-19 pandemic tasembuba tzüsem agi asenok menepa arutsü tetzua ataba atema lenmang ana dang lir.

1. Tanen makai total lockdown aliba
2. Temsüa alirtem ajak vaccine agiba shilem 80%-bosa kumer alitsüla

Total lockdown tanen makai agia aoba ajanga tesadok makai taliang amoksepa ayutsü. Anungji iba alima wara tesashi tongpang nungi adoktsü lenmang kaji nübur rangben vaccine agitsüba ya dang lir. Ajioda süaka, alima nung vaccination sentong tulutiba India lima tenzüker ita trok rentetaka, State nung aliba nütsüng shilem 30 dang nungi ishiba mezüngbuba dose aser nütsüng 10% dang dose anaprongla agia lir. Pandemic tenzükerba sülen nungi, State nung COVID-19 agi asür nisung noklang pungo dak tema kümogo aser tasürtemji timbaka vaccine magirtem lir. Health and Family Welfare Department ajanga tawa metetdaksüba agi, West Bengal nung aliba National Institute of Biomedical Genomics dangi 'genome sequencing' rangben agitsü atema sample 98 yokba nungi 93-bo Delta variant liasü, koba variant ajanga India lima wara tanabuba tzüsem agi mejungi kongshia anakshitsüdar. Osang tajung kaji, tang nguteta aliba kuli ajanga AstraZeneca vaccine (India lima Covishield ta ajaba) ya dose ana agiba sülen mozükidang munga anepalutsüsa mesüi aser Delta variant agi taküm samatsütsüsa aliba shilem 90-tema küzmüktetba shia lir. Osang tamajung kaji, Northeast nung aliba state tenet rongnungi, vaccine agiba tsütsü asadanga Nagaland-bo teküboktiba jenjang nung lir. Mozükidang amungtsüsa akümba aser taküm samatsüba anema vaccine yagi mapa inyaktetba kuli liaka, kechi agi state nung vaccine agitsü atsüayongtepdaaktsür?

Nagaland nung vaccination lenmang nung tetsükdaktsü tulutiba rongnung mezüngbubaji Lai O nung Tsüngrem anemba (Antichrist) mapa den medemdanga prayer centre ka nungi COVID-19 vaccination ya 'temenen maitsü' ta takzua sayutsüngiba nungi liasü. Tang asenok ama Khristantem shirnoki 'sarasadem nung nokinketer' aser 'shinmangdangertem' Tsüngrem ama bilemer, parnoki shitakba tanüla osang indang kechi shidir amanger (kechiyong meimchirtem dangi Tsüngrem osang abentsü asoshi parnok ya sahimtet ta angateter). Tsüngremklar kati vaccine ya 'mojing maitsü' (666) ta shira asenok aikati melamela dang ibaji agizüker.

Ibaji ajanga alima nung menatepba tashitak wara balala anema raratsü asoshi vaccine tasen ka yanglutetba shia 'sarasadem nung takotet mongin' aser 'shinmangdangertem' ajanga kechiba Tsüngremi temedongshitsü kabo yoker ta onük tajung ka kuma jembiteptsüsa bener arutsür. 2018 küm linük nung India sorkari Measles-Rubella vaccine agitsü sentong ka tenzüka aoba mapanga 'sarasadem' aser 'shinmangdangertem' Measles-Rubella vaccine yagi tanur tetsütem tanur medangdaktsütsü ta takzua aser tekümdangtsütem metetdakja liasü. (Tajungba nung angatetsü mechi, item ajem atohba anema jembirtem dang kechi komala mengudangba technology tashi balaka agi Measles-Rubella Vaccine ya tetsütem dak masü saka tanurtem dak dang atoh nung tetsütem tanur madangtsüsa kümdaktsür-ar rasaa shiangjung? ta marendaki asüngdanga liasü).

Ibaji ajanga khen-khenbo- 'sarasadem' aser 'shinmangdangertem' osangtemji Tsüngrem nungi masü saka taoksaba agi mesüra yamaji asütsü ta bilemba mesüra tesüba mapang ajangshiba tatalokba kar agi parnok temulungsentsü dangi yimdangi arua jembirba asütsü ta bilemdangtsüsa kümdaktsür. (Tatishitsü agi, tanü tendak takzütakponger aikati Indira Gandhi nung mapang tanur madangtsü atema vaccine agiba otsü den medemdanga. 1970s nung asür India Prime Minister den lar jabaso Sanjay Gandhi nati linük nung tanur ana dak tali sosema alirtem ajak ozüngsüa tanur abenba lenmang shibangtsütsü (vasectomies) densema nütsünyongsük züienba azüoktsü mechi inti sterilization programme tenzüksü merangdanga liasü. Iba khangtepa inyaktsü ayongba sterilization programme ajanga linük nüburtem aoksatetpdaktsü aser tsübutetpdaktsü. Nisung ajak tanur medangdaktsütsü atema tang Mrs Indira Gandhi-i sentong atonga inyakdar ta olulu aser bilemba tiyazü osangtem mapang shia angashia parnok intet. Tang Tsüngremi 'alima nung jenti rena alitsü' tuyuba aser 'tanurji kotak nungi anguba temoatsü' ta amanger Khristantem, yamala mapa ya temenen teka aita sayatenyar ta amanger. 'Nasbandi putu' nung lidanger 'sarasadem' aser 'shinmangdangertem' shirnok sterilization olulu agi tsübuoka lir parnok tokolok shisatsü nungi tang tasenba vaccine yagi tanur medangdaktsütsüsa tesendaktep lir ta vaccine anema tetzüsür asü? Yamajia asütsü akok. (Iba kasa tebilemdangbaji ajanga, kechiba 'sarasadem' aser 'shinmangdangertem' 'aikati iba lanur asentenshi sentong nung adener lanurtem aika NPSC/UPSC nung takok angutsü indang', 'Tashitak aser temenen indang', 'Lep süngden' indang aser yamala balala aser balakaji sasatsü aser temenen aser tekümtet indang takzua jembir.) Tesasatsü kaji yamala tanemba kecha malir 'sarasadem' aser 'shinmangdangertem' odang Tsüngrem osangji ta sür sangoktsür saka khen-khenbo takoksa tulua-a adokdaktsür.

Vaccine aser 'temenen maitsü' tetsüngda tetzüdangbajia tuluba akümtsü mela-melar. Asenok Khristantem Temeshi Laishiba Jungkaiadok kaket nung alima atemtsü indang zülua aliba kulitem nung teti medemdangtsü janrar. Yamala asüba ka atalokbaji 'temenen maitsü' kümtsür. Putu tatembanglak ka nung asenok alir ta amanga, sorkari 'asen juri arlla' ka den külemi repsema langka inyaktsü asateta sentong kechisa atongdir item nung teti temulung malemer. Iyongji sorkari 'aadhaar' ta ajaba national registration system ka renemtsü atema nisung shia alakteta balala aliba temeyong aser tenük pangmong kodang otazüktsü tenzüker, idangtoa 'temenen maitsü' den 'aadhaar' tesendaktep aliba indang takzütabong aika liasü. Tang COVID-19 ya alima tatembang kati arudaktsütsü atema temenen mojingi inyakba 'tatembang jenjangdong' rongnung ka ta tamangertemi amanga alidang, aser asenok atema ajem agitsü dak alaka tanga lenmang kecha mali kumer alidang, aikati iba ajem atohba ya a temeneni maitoktetsüsa stamp ajenloktsüba mapa ka ta küra-küraa angateta amanger.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Mizoram nung Arogoi Covid wara atema sarasademtsü ayongzük

July 21, 2021: Northeast India state tem nung coronavirus wara kanga prokba mapang Mizoram nung tongti Arogotemi tentetba committee kati Amongnü coronavirus wara atema sarasademtsü ayongzük. Mizoram Kohhran Hruaitute Committee (MKHC)-i Khristantem dang Amongnü aonung 7:00 ako nungi pei kidang sarasadem mapang agitsü mepishia metetdaksü.

State yimtiba, Aizwal nung Zarkawt Presbyterian Church building nunga sentong ka agitsü, aser iba sentongji local

cable televisions ajanga live yoktsü, ta Arogo lenir kati metetdaksü.

"Mizoram State-i akokba tashi meranga inyakdar aser doctor tem den medical mongintemia kanga meranga inyakdar. Ibaji ajanga kanga ajangzük saka tanü tashi wara mesungjemer. Asenoki asen menen atema tatok meshitsüla aser tekeraba nung iba wara süshia aotsü atema sarasademtsüla," ta Arogo lenirisa metetdaksü.

Khristantemisa tang Assam den arrtsü mangatetep ken o aliba, Myanmar nung


yimtenren tensa aser refugees atema-a sarasademtsütsü.

State Chief Minister Zoramthanga-ia nüburttem dang Arogoi ayongzükba ama ajaki shilem agia sarasademtsüla, ta ayongzükogo.

Khristan nütsung timba aliba state- Mizoram nung taoba Honibarnü nisung 483 dak coronavirus puteta liasü aser state nung tang tashi nung iba tashidak agi nisung 120 dak tema süogo.

State sorkari July 18, 2021 nungi tenzuka anogo tenet tashi Aizawl Municipal Corporation area lockdown süogo.

'A Rush of Hope' film ajanga nisung aikati Khrista agizük



July 21, 2021: Pastor aser sayutsungir, Greg Laurie-i, nisung million 1.8-i Harvest Crusade indang 'A Rush of Hope' film reprangogo aser nisung 16,000-i Khrista agizükogo, ta metetdaksü.

Coronavirus wara aliba ajanga Pastor, Greg Laurie-i küm shia ayongzükba Harvest Crusade ya online ajangadang agia liasü aser tang mezüing nisung meyrjang aikati Yisu Khrista nem taküm bendanga agütsüogo.

"Iba ya Tsüngrem den temba ayimba otsü lir. Iba tetezü taküm nung na kodanga kija malir. Yisu Khristai na kodanga metoktsütsü ta ashir. Kechiba ni taküm alir?. Tsüngrem den tesendaktep yanglutsü atema ni alimai aru. Taküm nung tetezü keta litettsü

atema Pa den jajatsüla aser ni asoshi Pa sentongji angatetsüla," ta pai ashi.

"Menenpur aser temeshi Tsüngrem na tsüngda apo latsütsü atema Yisu dang temsüa liasü," ta pai ashi.

Laurie-i twitter ajanga, "A Rush of Hope" movie nisung million 1.8-i reprangogo aser nisung meyrjang 16-i Khrista nem pei taküm bendanga agütsüogo, ta metetdakja liasü.

"Asenoki osang tamajung aika angashiogo, anungji nenoki osangtjung kar anganiüa alitsü ta ni bilemer," ta pai social media ajanga metetdaksü.

Harvest Christian Fellowship nung pastor, Laurie ya ghonda ka movie nungji host lir aser iba film nung Erwin Brothers films nungi clip asem, Khristan kententer telok For

King & Country, MercyMe aser Jeremy Camp nungeria shilem agia lir.

Iba film ajanga taküm nung tasüngdangba aika atema telangzüba agütsür, ta Laurie-i ashi.

"Putiotsü nung onoki otsü tasen aika yanglutetdar," ta Hombarnü Laurie-i social media video ka ajanga metetdaksü.

TV nung iba film sayutettsü atema Khristantem nem tenla agütsüadaksüner, ta ashi.

'A Rush of Hope' film dak sendakba nung Laurie-i, "Taküm ya film ka mesüka lir. Film tetenzüklen, tiyonglen aser tatembanglen tesüngmangtsü, yipru mapang aser tammang mapang aika lir. Ajisüaka tepor tajung aser tesangwa-a teti alir," ta ashi.

Chhattisgarh State nung police-i pastor Firoz Bagh apu

July 21, 2021: India kübok Chhattisgarh state nung Khristantem tekülem sentong agiba mapang nung Hindu yimsü alia amanger telok kati timtem agütsü aser pastor-i kangshia Hindu nunger Khristan yimsü dangi meypdaksür, ta tai tonglokja apu.

July 4, 2021 nü state yimtiba, Raipur nung Pastor Firoz Bagh'er kidang nisung 30

shia adenshir Pastor Bagh-i sayutsüngiba mapang nung Hindu nunger 35 shi adenshia kiji longbangba sülen Khristantem anema yimyim ayim aser tekülem sentong tagidak mapang timtem agütsü.

Parnoki police aja aser Pastor Bagh-i Chhattisgarh nung anti-conversion ozüing alema inyakogo, ta tai tongloktsüba sülen police-i Pastor Bagh puer ao.

Osangbener den jembidang pastor-i, "Ozü Arogo ya register süa aliba organization ka lir, aser ni para ki ka nung tesüiba küm 20 tashi sayutsüngia arur," ta metetdaksü.

"Nisung aika kü dangi arur aser ajak atema kishi lapokja dang lir. Tsüngrem O ajanga tesünep aser teimla agütsür. India ya secular linük ka süaka kü dang sayutsüngi tesü ta ashir," ta paisa metetdaksü.

ANOGO ABEN TSÜNGREM DEN

Onoki akok

Aser Pai parnok dang jembitsü tenzük. Tanü iba lai nenok narong nung atalokogo. Luke 4:21

Yisu Satani arem nung atidanger külen, Pa Galili aru aser Synagogue nung sayutsüngitsü tenzük. Nazareth, Pa alidak, Pai Isaia kaket nungi azüing, "Kibuba Tanela Kü dak lir..." (Luke 4:18). Idangji Pai ashi, "Tanü iba Laishiba nenok dak atalokoko." Aikati Pai Tsüngrem atalar ta bilem aser tepsettsü merang, saka Tsüngremi Pa kümzük. Pa tenzükba mapa ajak agi kechi liasü? Ozüing aser ainkar shin O indaktsütsü Pa maru, saka itemji atalokdaksütsü Pa aru (Mathi 5:17).

Mezüing putu nung nüburt ket nung Tejen Lai aser ainkartem kaket dang liasü. Tanü asenok ket nung kaket 27 lir, koba dang Tasen Lai ta ajar. Idakji ataloktsü ashibatem aika lir aser itemjia ataloktsü. Tejen Lai mapang aser tanüa, Tsüngremi asenok koma lidaktsüner iba tesayubaji lir. Ozüing aser ainkartem O aser Yisu, Paul, Peter aser tangartemi taküm koda talubosa alitsü sayuba angur. Saka tatem anogo nung kechi ataloktsü Tsüngremi asenok dang tejangja sayur. Yisu, Timtemba Kilir, shin O atalokdaksütsü mezüingbuba aru, aser tanaben Pai kechi ataloktsü ashi aji atalokdaksütsü arutsü. Iba anogoji yakta arudagi. Na renema lir ma ?

O Tsüngrem, Nai taküm nangzükba asoshi ni Ne tenüing kanga asanger. Temenen lima den Ne tenangzükba aser taküm mesüra tashi angutsü nangzükba lemsateptsü yariang. Amen.

Intl' Religious Freedom Summit tembangba sülen maparen tenzükogo

Washington DC, July 21 Mezüingbuba nung US nung (Agencies): Tan ita Joe Biden administration-i Washington D.C nung anogo International Religious asennü 2021 International Freedom atema Ambassador- at-large shimtsü aser agiba mapang nung alima tesem ambassador leniba nung balala nung Khristantem religious freedom atema reshikangshiba aser religious inyaktsü. Taoba ambassador freedom jenjang asadanga liasü. Borwnbak leniba nunga küm

China nung Khristantem aser Uyghur Muslim nunger reshikangshiba nungi tenzük Pakistan nung Ahmadiyya Muslim nunger reshikangshiba aser Iraq nung Yazidis nunger reshikangshiba densema alima tesem balala nung yimsü balala amangertem reshikangshiba jenjang asadanga o lemtepa liasü.

Senden nungsa alima tesem ajaklen nisung ajaki peii melungba yimsü sadoka amangtetsü atema inyaktsü asoshi jembia liasü. Tesüsa Biden administration-i linük balala den senden amenba mapang shia katetogo aser tang maparen tenzükogo. Taruba itatem aser kümtem nung US-i leniba nung international religious freedom atema sorkar balala den senteper inyaktsü.

Senden nungsa alima tesem ajaklen nisung ajaki peii melungba yimsü sadoka amangtetsü atema inyaktsü asoshi jembia liasü. Tesüsa Biden administration-i linük balala den senden amenba mapang shia katetogo aser tang maparen tenzükogo. Taruba itatem aser kümtem nung US-i leniba nung international religious freedom atema sorkar balala den senteper inyaktsü.

OLONG PAITEP # 5882

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

TIPILEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzük ayudak - (3)
- 9. Nungdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzük tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaktsü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsungda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 5881 TELANGZÜBA

TIPILEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioaktsü,
- 5. Lenti, 7. Tajangzük, 11. Teronem,
- 12. Sempa, 13. Jahaz.



PASTOR-BA AKHI NISUNG TAMBUR KA DANGI KIPOKSEM AO :

- Pastor** : Obou....Na anema lir sudi.... Ni ne nem sarasadem ka agütsütsü aruba adi.
- Oboula** : Ayyaa...Kanga-ha pelar-ah...Ni Tsüngrem taochi agi kanga junga lirko hiii.
- Pastor** : Obou...Asen menen yong Yisu Khrista asü...Pa asüba agi asenek alangzük.
- Oboula** : Waaaa...!!! Ano shiba asü-a ta...??? Ayyyaaa...tashi akaba mapang to asübo Leper atudak danga yariteptsüba ako....Joko tambur kümer koda asütsü-do.
- Pastor** : Obou...Tang asüba masü...Küm merijang ana tejakdang asüba ashir-ba aja.
- Oboula** : Eeessh...Harbang tawa-tanü Corona-a ahaba wara yagi asü-ba asü ta ashir tang ashi....alemli tar nunger mapang asü-ba....ajibo khenyongi tejembishi.
- Pastor** : Obou....Ni na atema sarasademtsüdi...Na temenen kar danga lira aji bushia sarasadem-ang nooo.
- Oboula** : Waaaaoooo...!!! Pastor-ba na ya year-bo masü sudi...??? Ni ya teti temenen mojing tarudaktsü niii....ta har-ha-demer....Ano kechi temenen bushitsüba ashir.... !!!??? Tetsüba-metsübai temenen bushitsüba nooo...!!!!!!??????
- Lilir : L. Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Kilem

(n) tzünglu aser anü nungi kümzüktsü atema ki temalen lembangba (roof)

* Akhidangbo süra agidang **kilem** tongbanga liasü.

Kelem

(n) kimalen kilem agi akümbanga alidak (porch)

* Ozü **kelem** kanga sadema lir.

NAI-A YA METETTER MA?

INDIA NUNG RAILWAY TUNNEL TALANG TEM:

(Yashi adok nungi...)

* Honnavar (T-84)	2,830 metres
* Chowk (T-3)	2,628 metres
* Parchuri (T-27)	2,552 metres
* Khowai (T-2)	2,500 metres
* Sangar (T-4)	2,454 metres
* Monkey Hill (T-25C)	2,304 metres
* Aravali (T-21)	2,161 metres
* Chiplun (T-16)	2,100 metres
* Tamelong(T-8)	2,010 metres
* Longtarai MG(T-13)	1,936 metres
* Thizama BG(T-8)	1,849 metres
* Parsik Tunnel	1,681 metres
* Bogada Tunnel	1,600 metres

TANÜBO NAI LANGZÜANG

Q. Koba yimti nung Mandela Day mezüng amung?

- A.London B.New York C.Paris D.Geneva

—————(Taruba adok nung onoki langzütsü)

YASHI ADOK TELANGZÜBA : Assam

SUDOKU # 5922

TELANGZÜBA # 5921

			3			1			7	8	4	2	1	9	6	3	5
6	7	1				2		5	2	9	3	6	7	5	8	1	4
					2				6	1	5	3	8	4	9	7	2
2	8	3	7	6	4		1		8	2	1	7	5	6	3	4	9
4	6	7		9			2	3	9	3	6	1	4	2	5	8	7
	5		8	2		4	7	6	5	4	7	8	9	3	2	6	1
	9	2	4				5		4	6	8	9	2	7	1	5	3
	1			3		9		7	3	7	2	5	6	1	4	9	8
5	3	4			9		8		1	5	9	4	3	8	7	2	6

OJANG LUTEP # 5467

- JALAR :
- LAO :
- MAIALIBO :
- MASHNGAI :
- ÜRTOKTS :
- KASA :
- BOKOERITAK :
- ZÜÜNNGZGA :
- OKANGAA :
- URAY :

OJANG LUTEP TELANGZÜBA # 5466

NISUNG TASEN AGI MELENYONGA TANGATETBA TAJUNG MEKARA KECHA TAJANGZÜK MALI

TAN HOPTA ATEMA - KOMA SÜLA ?

Q. Akhi tsüraburtemi yim akümdang yatetba ali kimong aser alushi dak alaka, tanü putu taseba nung kibong kati ajangzük tetba ali rongsentem madakbo, kibur küma senmangtsü asoshi, tetsür - tebur aser jala- jabaso ta mali, kibong nung tsürabur ana mulung südaktsü nunga koma süla ?



July 21, 2021 nü Kolkata nung LOP West Bengal Assembly, Suvendu Adhikari aser TMC nung inyaktertemi tepsetba kinüngertemi asürtem nem akhüm agütsüba noksa nung angur.

Opposition lenirtemi 2024 elections atema renemtsüla: Mamata

New Delhi, July 21 (Agencies): Bodhbarnü West Bengal Chief Minister aser Trinamool Congress (TMC) tongti, Mamata Banerjee-i opposition party lenirtem dang 2024 küm Lok Sabha elections atema longjemtsüla, renemtsüla aser opposition party temi Front ka tentetsüla, ta ayongzük.

"Democracy lendong nung lir. Asenoki tang nungi tenzükä 2024 küm (election) atema renemtsüla. Asenok phone ajak itangiter. Minister tem phone-a itangiter. Pegasus nung ya lendong keta lir. Ni Chidambaram (Congress), Sharad (NCP) mesüra Shiv Sena chief minister den mejembiter, kechiyong onok meyong phone itangiter," ta lai ashi.

TV ajanga state nüburtem den jembidang lai English aser Hindi oshi agi dang jembia liasü; taoba mapangtem nungbo lai

Bengali oshi nung dang jembia liasü.

"Asenok atema küm ana ser tesa dang anünga lir. Elections atongtsü mapang nung ang longjemba agi kecha masütsü. Anogo shia renema alitsüla. Linük aser state tem kümzüksü nükjidong nung asenoki inyaksüla," ta lai opposition party tem dang ashi.

Tang coronavirus wara aliba agi iba sentong agiba ya video ajanga dang lemsatapa liasü, aser opposition lenirtema aika New Delhi nung aliba Constitution Club nung adenshir lai jembiba onük angaa liasü.

Lai jembiba o angartem rongnung NCP nungi Sharad Pawar aser Supriya Suley na, Congress nungi P Chidambaram aser Digvijaya Singh na, SP nungi Ramgopal Yadav aser Jaya Bachchan na, Dravida Munnetra Kazhagam nungi Tiruchi Siva, Telangana Rasht

Samithi (TRS) nungi Keshava Rao, AAP nungi Sanjay Singh, RJD nungi Manoj Jha, Shiv Sena nungi Priyanka Chaturvedi aser Akali Dal nungi Sardar Balwinder Singh Bhunder nung densema liasü.

Iba sentong nung Mamata Banerjee den election atema asalentong yanglutsür mongin, Prashant Kishor densema liasü.

"Front ka tentetsü atema asenoki tang nungi tenzükä inyakdi. Asenoki komaka menodir yamaji amajok nung mapang indoktsü," ta Mamata-i ashi.

Laisa taruba hopta ka tsüngda New Delhi nung opposition party balala nungi lenirtem senden ka ayongzükä amentsü ayongzük.

"Kobi melii ni Delhi-i aotsü. Chidambaram mesüra Pawar-i July 27 nungi July 29 tsüngda senden ayongtetra ni-a iba senden nungji dentetsü," ta lai ashi.

Oxygen maliba agi Covid agi shiranger aika sügo: Shiv Sena

New Delhi, Chiteni/July 21 (Agencies): Bodhbarnü Shiv Sena lenir Sanjay Raut-i, coronavirus tanabuba wave mapang nung oxygen maliba agi coronavirus agi shiranger aika sügo, saka Centre sorkari tiyazü jembio, anungji sorkar anema ken o benoktsüla, ta aitsü.

Osangbenertem den jembidang Raut-i, Centre sorkari yazü jembibaji oxygen maliba agi asür kinüngertemi angashi nungbo koma asütsü?, ta asüngdang.

"Ni kecha anga mashir. Oxygen maliba agi asür kinüngertemi iba o ya angashi nungbo koma asütsü? Sorkar anema ken o ka benoktsüla. Parnoki yazü jembir," ta pai ashi.

Mongolbarnü Rajya Sabha nung Congress MP, KC Venugopal-i, coronavirus tanabuba wave mapang nung oxygen maliba agi coronavirus agi shiranger aika lenmang aser hospitals nung süadok asü?, ta asüngdangba langzüdang Minister of State for Health, Dr Bharati Pravin Pawar-i, coronavirus tanabuba wave mapang nung oxygen maliba agi nisung asüba osang states aser Union territories-i memetdaksü, ta metedakja liasü.

Minister-isa, health ya state kübok lir, yamaji states aser

UTs-i coronavirus putetba aser iba tashidak agi asüba osang Union Health Ministry nem metedaksür, ta ashi.

Pegasus project dak sendakba nung Raut-i, sorkari mimshitsü kecha melira kechiba parnok tsübur?, ta asüngdang.

"Opposition-i Joint Parliamentary Committee kati iba ken o bushisüngdangtsü mesüra Supreme Court-i tiyongtsü aita inyaksü atema takhangba agütsügo. Ravi Shankar Prasad ya opposition nung ali asübo pai-a kasa takhangba agütsüla. Ochiji jungkai adoktsüla. Mimshitsü kecha melira kechiba nenok tsübur?" ta pai sorkar dang asüngdang.

Pegasus project osang jungkai adokba sülen opposition lenir aikati iba ken o bushisüngdangtsüla, ta takhangba agütsügo.

Hombarnü Union IT Minister, Ashwini Vaishnaw-i, media osang nungji ochi mali, aser iba ya India nung democracy tenung menüksütsü nükjidong nung inyakba lir, ta metedakja liasü.

July 28 nü Congress MP, Shashi Tharoor leniba nung Parliamentary standing committee-i Ministry of Information & Technology aser Ministry of Home Affairs dang Pegasus dak sendakba aika asüngdangtsü.



July 21, 2021 nü New Delhi nung Ghazipur arrtsülen BKU lenir, Rakesh Tikait leniba nung aluyimertemi aluyimba ozüng tasen anema Parliament tashi longkak aita aotsü lia yimyim ayimba noksa nung angur.

India nung coronavirus agi shiranger nisung 4,18,480 sügo

New Delhi, Chiteni/July 21 (Agencies): Maharashtra state nung coronavirus tashidak agi shiranga asürtem data junga bendenba sülen ibaji densemabo linük nung anogo ka kija nung iba tashidak agi asür 3,998 liasü.

Tang tashi nung India nung nisung 4,18,480 coronavirus agi sügo aser tesüiba ghonda 24 tsüngda nisung 42,015 dak coronavirus putetogo, ta

Bodhbarnü Union health ministry data ajanga metedaksü.

Tang India nung coronavirus agi teshirangdakpur 4,07,170 kümogo aser ibaji coronavirus caseload nungi shilem 1.30 lir; linük nung iba tashidak agi shiranger anepba shilem 97.36 jungogo, ta Bodhbarnep 8:00 ako nung Health Ministry-i metedaksü.

Mongolbarnü samples

18,52,140 tendanga liasü aser tang tashi nungbo samples ajak senteper 44,91,93, tendangogo, ta ICMR-i metedaksü.

Linük nung iba tashidak agi shiranger 3,03,90,687 anepogo aser shiranger asüba shilem 1.34 (timba) kümogo, ta Health Ministry-isa metedaksü.

Taküm January 16 nü India nung vaccination drive tenzükba sülen tang tashi nung vaccine dose crore 41.54 agütsügo.

Tanü opposition-i aluyimba ozüng anema Parliament nung longkak aitsü

New Delhi, July 21 (Agencies): Taoba mapang Haryana Chief Minister aser Indian National Lok Dal (INLD) tongti lenir, OP Chautala-i Bodhbarnü Singhu arrtsü semdanga aluyimertem ajuruba sülen pai, July 22 nü opposition party balala nungi MP temi Parliament nung aluyimba ozüng tasen asem agienang ta takhangba agütsütsü, ta metedaksü.

Osangbener den jembidang pai, "Asüng Opposition MP temi Parliament nung longkak aita aluyimba ozüng tanak asem agienang ta takhangba agütsütsü. Sorkari tem ozüng agentsüsa onoki inyaksü," ta metedaksü.

Tzüngluruwa mongpu Parliament July 19 nü tenzükogo aser August 13 nü tembangtsü.

Mongolbarnüa pai Delhi kübok Ghazipur arrtsü semdanga aluyimertem ajurua

liasü.

Taoba mapang Haryana Chief Minister, Chautala ya tesayurtem shimba ochimashi ken o nung küm 10 tepuokdak ayuba sülen tawa chioka liasü.

"Item ozüng ya agentsüla. India nung rongsenkettsüng tamendakdakji aluyimba lir. India nung rongsenkettsüng tongtiretji aluyimba lir. Longkak aitba ya aluyimertem aser alu nung aayangertem atema dang masü saka linük nübur ajak atema lir. Onoki aluyimertem temeden atema raratsü," ta pai metedaksü.

Delhi Police-ia Jantar Mantar nung longkak aitsü atema aluyimertem nem temelaba agütsügo. Aluyimertem lenir kati, aluyimertemi Jantar Mantar nung tesünep nung longkak aitsü aser aluyimertem shinga Parliament-i maotsü, ta metedaksü.



July 21, 2021 nü Patiala (Punjab) nung NSQF (National School Qualification Framework) züngsemtemi sorkar dang mapa agüjang, ta takhangba agüja Punjab sorkar anema longkak aitba noksa nung angur.

China nung tzümetsüng agi timtemer; nisung 12 süogo



Central China nung aliba Henan Province kübok Zhengzhou yimtung nung nüburtem tzümetsüng ajanga jaja aoba noksa ka yangi angur. Nütsüng yongsük onsara aliba province nung tzümetsüng lendong tesashi nungi kumzüksü mechi China mitkartemi tzünokdang ka poksaa tzümetsüng yimdokdaksü. Zhengzhou nung tzümetsüng tesashi adoka nisung aika sür lia Luoyang yimti nung mitkartemi Mongulbar aonung iba mera ya agitsüsa akum.

Beijing, Chiteni/July 21

(Agencies): China nung tzünglu kanga sashia arua ali telung nung railway lenmang ka tzü agi mobanga nisung 12 asü aser passenger tem taolen mali lenmang shibanga liasü.

Social media nung video prokshiba nung nikongdang senzürtem tekolak tzüma nung adoka liasü. Tzü ya platform nunga yima liasü.

Henan province kübok ali telung nung lenmang yanglua alidak nungi nisung 500 dak tema kumzük, ta ketdangsürtemi ashi.

Anogo aika tzünglu aruba ajanga ki-o-jen raksatsü aser nisung 200,000 shi pei talidak nungi danga tesemtemi anir aotsüsa akum.

Lenmangtem ayong akum, kong gari aser jana-rüja ya kanga kera ponger oa liasü. Tetsüng agi senzürta aika kumzüka liasü.

Henan province nung yimti ter dak tema nung tzümetsüng agi kongshi aser yangji nisung aika takum sama aser ki-o-jen raksa, ta Tir Xi Jinping-i Bodhbarnü ashi.

Tzünokdang aser tzü

rizünga ayuba tesem aika nung tzü talila akum aser sepaitem dang ayongtem mesüdoxksü ashi. Henan kübok tesem aika nung tayimtsü aser train tem anentsüsa akum.

Provincial capital, Zhengzhou nungbo küm tepiyong tzünglu aruba den saku anogo asem nung arua liasü.

Mongulbarnü yimti nung tzümetsüng nungi kumzüksü yua alibatem metsüngbanga railway tunnel temi yimoka ai.

Train indang kishi nungi tzü yimoka aita temetsüla tashi

atsüng aser tanem tanemi temokok aser tekong atong. Akok tashi onoki train indang menden nung nokdak, ta tetsür kati China nung social network, Weibo nung zülua liasü.

Tsüraburtemi tanurtem tzüma nung ajungket aser dangartemi osettsüset bona alibatem indoka liasü.

Ghonda tesadang ka shi lir passenger kati tango sashitsü kanga tasak kumogo, ta ashi.

Train nungi madokteti alirtem anitetsü mechi line shibangtsü atema nikongdang 6:10 ako nung totuyuba aru, ta Zhengzhou sorkar ketdangsürtemi ashi. Nisung pongu yirur anepalu aser nisung 12 asü.

Central China kübok yimti ka nung tzü agi metsüngbanger aliba nursery school ka nungi tanurtem kumzüka liasü.

Tanurtem ya tekumzükertemi plastic tub tem nung anidena tzüma nung liasü.

Mongulbar aonung First Affiliated Hospital of Zhengzhou Hospital nung mapang tatsüka power ao saka tangbo yanglutetogo, ta Zhengzhou Municipal Party Committee ajanga Weibo nung sangdong.

Parnokisa kangasa mejungi shiranga alir nisung 600 tashi danga tesem kati bener ao, ta ashi.

Saka tzü metsünga atuba ya Zhengzhou kisung nung masü tesem balala nung liasü.

Luoyang yimti nung aliba tzünokdang nung yipru agi kongshiba sülen jara meter 20 (65ft) rakpoka liasü, ta ketdangsürtemi ashi. Iba tesemi sepaitem yok aser iba jara ya mashi mapang laotsü, ta sangdong ka nung ashi.

Sishui jila nung alirtema tzü agi metsüngbanger taolen maka kilem kolak nung liasü.

Honibarnü nungi tenzüka Henan nung kodanga marudangba tzünglu kanga sashia arur, ta China nung tzüngsang-mopung takzürtemi Bodhbarnü ashi. Iba ama tzümetsüng ya küm 1,000 nung khen adoker, ta yangji alirtemi ashi.

Zhengzhou nung Mongulbarnü tzünglu ya 624mm arua liasü, aser kasaji nikongdang 4:00 ako nungi 5:00 ako tsüngta asember arua liasü.

Iba region kübok tesem kar nung maneni yipru tesashi arutsü aser tzünglu sashia aruba ya Brehostibarnü ang atemtsü amai takzüteta lir.

Kuli balala ajanga tzümetsüng ya adok, saka talisa tzü-mopung melenshia tzünglu tali aruba ajanga alitsü akok.

China nung Yellow River tebanglen shilem ka ama Henan province ajanga tongtipang ayong aika ayimer, kong tzümetsüng mela-mela adoker.

Zhengzhou nung nütsüng yongsük million 12 lir, aser iba yimti ya Yellow River ayongkum nung lir.

Tanzania opposition Chadema party lenir puogo

Mwanza, Chiteni/July 21 (Agencies): Tanzania indang opposition party tongtiba, Chadema ajanga ashiba agi, constitution yanglushitsü asoshi takhangba agüja mungdang ka agitsü lia par lenir aser danga züngsemtem apu.

Freeman Mbowe aser Chadema züngsem ter yasung linük northwest tsütsü rongnendak Mwanza yimti nung lungbang, ta party ajanga Twitter nung Bodhbarnep metetdaksü.

"Tanzania nung temeden ajemreptsü merangba onoki aitsür. Tir John Magufuli yimsüsüba mapang nisung ka kijai yimsü asüba tang tashi aliba temaitsü sayur," ta parnoki aitsü.

"Freeman Mbowe ya pa anenzükba hotel-i anepdang 2:30 ako (par mapang) nung aruba mapang police temi dangar lenirtem den külemi apu."

Chadema züngsemtem ya Mwanza police station-i anir ao saka Mbowe ya kong aliar osang kecha mali.

"Police temi Chadema mendenpuba kong ali aser

kechiba pa apu, itemi metetdaksütsüla," ta Chadema-i ashi.

Saka police nungi osang kecha sangdonga mali.

Ajungbena Magufuli sür March ita Tanzania nung Tir Samia Suluhu Hassan ya tetsürtem rongnungi tir mezüngbuba kumer ita pezü junger lia Chadema lenirtem ya apur.

Magufuli yimsüsüba yimya ya Hassan-i melentsü, ta teimla tulu liasü.

Taoba mapang Chadema nungi tir atema toktepsang aser yang Europe nung jenoka alisang Tundu Lissu-ia tweet ka nung March ita Magufuli asüba sülen Hassan temaba jenjangi ajungketba ajanga Magufuli-i tashiyim amshia yimsü asüba aser democracy anema raraba tatem kati arutsü teimla agütsür, ta shia liasü.

Coronavirus tashidak wara prokshia aoba nungi nokdangtsü atema Mwanza provincial ketdangsürtemi lokti adenshiba nokdanga lia Mbowe-i constitutional reforms atema senden amentsü nangzüka liasü.

Nigeria nung anogo 42 sülen yimdaklir nisung 100 chiok

Abuja, Chiteni/July 21 (Agencies): Nigeria northwest tsütsü Zamfara state nung aliba police temi shiba agi, June ita tetenzüklen yimdaklir nisung 100 pua bener aoba parnok apur den jembishinüba sülen chiokogo.

Zamfara state police indang odongtar Mohammed Shehu-i Mongulbarnü sangdong ka nung ashiba agi, talenba kecha mali parnok chiok aser iba asoshi tapur nem senotsü mesüra osettsüset kecha magütsü.

Pua aliba chiokertem ya temang tendangba sülen parnok kinungertem den ajuruteptsü, ta Shehu-i ashi.

June 8 nü prangbong bona aliba nisung telok kati Manawa yimtsüng lungbanga tetsür aser tanurtem densema nisung telok ka ya arem-min leni bener ao.

Nisung apuba asoshi temerenshi kecha magütsütsü ta state ketdangsür aser police temi nangzükba sülen pua aliba yimdaklirtem ya chiok, ta osang ka ajanga ashi.

Nisung 24 temang majungba agi arem nungi ano anir madok, ta osang ka ajanga ashi.

Northwest aser central

Nigeria nung kiset shiruru auyar aser tashiyim agi nisungtem pua bener aoba telok balala tang tali jateta lir, shirnoki yimtsüngtem amaker, yangji alirtem tepseter aser pua bener aor aser kidang aliba osettsüset aser kiset shiruru auyaba sülen ki-o-jen rongdoktsür.

Item mapa tamajung inyakba teloktem yagi tangbo school nung tenük yoker oa longbanga kaketshirtem apur aser parnok alangtsü sen meshir. Pua ayurtem ya kinungertemi sen agi alangzükter aser sen agi malangtetertem tepseter.

Item telok ya Rugu arem min tulu nung camp yanglua yangji amenoka lir. Iba arem ya Nigeria nung aliba Zamfara, Katsina aser Kaduna state tem aser kidanger linük, Niger tashi oa lir.

Hombarnü Zamfara state kübok iba ama telok kati yimtsüng ka amaktsü aliba ajanga iba yimtsüng kumzüksü asoshi police tem yoka liasü, saka iba telok yagi yangji police 13 tepseta liasü.

Taoba mapangbo Nigeria indang air force ajanga iba

ama mapa tamajung inyaker telok amenoka aliba camp tem maka liasü, aser linük north tsütsü iba ama telok den parnoki jembishinüba azüdokshi yutsütsü mechi maongba balala agüja aru. Saka mitkartem yokba aser yimjung ken o jembitsü merangba nung takok monguteti azüdokshir.

Taoba hopta ana tsüngta Zamfara, Kaduna aser Katsina states tem nung air forces temi anüngdang aser aonung telungpur züngsem noklang aika tepsetogo, ta ashir.

Deobarnü northwest tsütsü telungpuri prangbong injang kanga sashia khalokja Nigeria indang fighter jet ka tsükok, saka tayumtsü anisang ya tayimtsü nungi jokteta adoka kumzük.

Linük northern region nung iba amala telok ya kisung masü saka Boko Haram aser iba telok nungi jakzüka aoba Islamic State West Africa Province (ISWAP) temia küm aika azüdokshia arur.

Iba ama telungpur telok balala aliba ajanga Nigeria aser kidanger linük nungi nisung million 2.4 jungnüa jena ogo, ta United Nations ajanga ashir.

Nagaland rapper Kryztal-i music video ka sayaogo



Dimapur, Chiteni/July 21 (TYO): Kelhoulezo Dziivichii shiba dang KryZtal ta ajar pai 'Criminal' ta nungja agütsür music video tasen ka sayaogo. Iba ken ya pa asoshi tapet nisung ka aginüba indang lir. Ken nung nisung kati temulung

yirutsü aser tetsükdaktsü adoktsü aliba ajak sentoka toktsü tanaben meimtsü atema maongka agütsüba indang jembir.

Kenteneri pa indang ken tasenba nung kentenba yimya tasen ka bendeloknüa liasü aser yamaji melodic rap aser tropical music ajanga pa ajungmeso. Iba music vedio ya Nestvibe Ent-i produce asü. Music video director Macnivil aser co-director Maong Imsong liasü.

Iba music vedio ya Youtube nung inoktsüogo aser <https://youtu.be/K1R70csRAJs>, link ajanga reprangtetsü.

Mokokchung district nung Covid-19 dak sendakba tangazükba agütsür

Dimapur, Chiteni/July 21 (TYO): Lokti nem COVID-19 aser vaccine agiba dak sendakba nung tangazükba agütsüsü nükjidong nung Addl. Director DHFW Dr. Kika Longkumer-i anir, DPO (UIP&RCH) Dr. Ayangla Saku, ZLO & DMHP Dr. Tamsuyanger, BPM Tsurangkong Jongpongtsungba aser IEC personnel temi July 17 nü Longnak SC aser Chungtia yimsen semdang aser July 19 nü Changtongya CHC semdanga liasü.

Chief Medical Officer Office sangdong ka ajanga ashiba agi, shisalen agütsürtemi COVID 19 wara nokdangtsü aser herd

immunity ajangzükttetsü atema sentong nung shilem agirtem dang mapang shidak nung tashidak tendangtsü, SOP sülen anidaktsü aser vaccine agitsü ajungshia liasü. Parnokisa, COVID 19 aser vaccine agiba dak sendakba nung olulu osangtem indang jangjashitsü.

Block Magistrate, Tsurangkong, Atsung Walling-ia, Longnak aser Chungtia yimsen nungi lenirtem den sensaksema liasü.

Pastor, APW, Village council tekolak & züngsem, VDB, SHG, kiyong balala lenirtem, Deacon, ASHA, AWW, kaketshir lenirtem, Task Force aser Sub Centre aser

CHC Staffs temi iba sentong nung shilem agi. Ajak senteper Nokon, Longnak, Merayim, Satsukba, Chungtiayimsen, Tsurangkong, Longpayimsen, Medemyim, Moayimti, Watiyim, Aosenden, Aokum, Akhoya, Kelingmen, Unger, Liroyim, Yaongyimsen aser Changtongya kübok Longchara, Medical, PWD, Tsumokong, Electrical aser Antsubo kiyong nungi lenir 129-i sentong nung shilem agia liasü.

Iba sentong ya Sub-Divisional level administration den longjemer ayongzükba agi.

Tang tashi nung Chief Medical Officer Office nungi team-i Mokokchung District kübok yimtsü 30 dak tema ayimjema COVID-19 vaccine agiba aser mapang shidak nung temang anepaluba dak sendakba nung tangazükba agütsüogo.



OFFICE OF THE
YAONGYIMSEN KAKETSHIR TELONGJEM

TENÜNGSANG AGÜTSÜR



Sp. YANGERTEMJEN
TOP 4, HSLC



Kr. IMLINARO
SUBJECT TOPPER, HSLC

Tanü tetoktepbba lima ka nung alima kanga karaa ainba den jangyu medema ozü Yaongyimsen Kaketshir Telongjem (YKT) züngsem nungi Sp. YANGERTEMJEN S/o Late. Limaonen aser Wt. Puryangla, pai Saint Savio School, Chumukedima nungi taküm NBSE-i achaayanga agiba HSLC tatidang nung 97.67% nguteta Top 4 jenjang ajangzükttet nung pa nem tenüngsang tetushi tulu agütsür.

Tanabuba nung Kr. IMLINARO D/o Wb. Aosanen aser Wt. Takonungla lai Bridges Academy, Changtongya nungi taküm NBSE-i achaayanga agiba HSLC tatidang nung Environmental Education nung 100 marks nguteta State Subject Topper jenjang ngutet nung la nem tenüngsang tulu agütsür.

Tasembuba nung küm shia office ajanga GHS Yaongyimsen Compound nung azünger Class X kaketshirtem atema Hostel lapokja free coaching agüja arur. Iba Hostel nung "Late N.T.Longkumer Educational Trust Fund" tenüng nung par chirnurtemi tenla tulu agüja kaketshirtem ajaki takok ngutet nung kanga pelaba lemsateper. Iba den külemi coaching tepiyong shirnokisa nübu, rongsen aser shisatsü agi yaritepogo nenok ajak dang YKT ajanga pelaba lemsateper.

Iba dak alaka züngsem rongnungi shirnokisa taküm NBSE kübok HSLC aser HSSLC tatidang nung jenjang balala nung takok nguogo, nenok ajak nem YKT-i tenüngsang agütsür.

Sd/-
AKUMTOSHI
President, YKT

Sd/-
TIARENLA
General Secretary, YKT

Office Of The Longmisa Senso Mongdang

P.O. Mokokchung 798601. B.P.O. Longmisa
Mokokchung : Nagaland.

Tenüngsang Agütsür

Wb. LIMAKUM Pongen aser Wt. TAJUNGSANGLA Jamir na jala Kr. IMLISUNGLA Pongen HSSLC (Arts) tatidang 2021 nung Top 1 aser Education subject topper (99 marks) jenjang ngutetba asoshi Longmisa Senso Mongdang-i tenüngsang aser tetushi agütsür.

Iba den külemi Longmisa Senso nungi HSLC aser HSSLC kaketshirtem shirnokisa tatidang ajangetogo office ajanga nenok ajak nem tenüngsang agütsür aser tarutsü nunga takok ngudakjang ta sarasatemtsür.



(SATEMKABA)
President

(WATITOSHI)
Asst. Secretary



OFFICE OF THE
CHANGTONGYA KAKETSHIR TELONGJEM

PO- CHANGTONGYA-798613, DIST. MOKOKCHUNG

TENÜNGSANG AGÜTSÜR



YIMYATETLA

D/o. B. Tiameren
3 rd Rank, HSLC 2021
Subject Topper: Science - 100 Marks
Holy Cross Hr. Sec. School, Dimapur



LONGTILA JAMIR

D/o. N. Chuba Jamir
10th Rank, HSLC 2021
Subject Topper: Social Science - 100 Marks
Model Hr. Sec. School, Kohima



YASHJUNGLA

D/o. Late. Lemdongnukshi
16th Rank, HSLC 2021
Subject Topper : Environmental
Education-100 Marks
Christian Standard Hr. Sec. School
Changtongya Town



TEMSUSANGLA

D/o. Imsuyapang
Subject Topper: Social Sciences -100 Marks
Christian Standard Hr. Sec. School,
Changtongya Town

Changtongya Kaketshir Telongjem (CKT) mendenti ajanga nenoki takok naroküm tulu asen yimtsüng aser kaketshir nem bener arutsüba asoshi tenüngsang aser tetushi agütsür. Yamaji kaketshir shirnoksa HSLC aser HSSLC Examination 2021 nung takok tajung nguogo, tenüng metetshiaka nenok ajak nema tenüngsang agütsür. Tsüngremi nenok taküm aser tarutsü wadang ajak nung moajangma.

Sd/-
TALITEMSU JAMIR
President, CKT

Sd/-
TIARENBA JAMIR
General Secretary, CKT

Office of the TULI COLLEGE

Borbora Ward, Tuli-798618

ADMISSION NOTICE

This is to inform all concerned that the admission to BA 1st Semester and 3rd Semester will commence from 26th of July 2021 onwards. Forms and Prospectus will be issued from the office of the Tuli College from the 22nd of July to 29th of July 2021 from 10:00 AM to 12:00 Noon.

Courses Offered:

- BA General Course : English, Alternative English, Economics, Education, EVS, History, Political Science and Sociology.
- BA Honours Course : English, Education and Political Science.

Tuli College has initiated a Trust Award from this academic session known as Late M. Odiba Imsong Memorial Trust Award to motivate and develop a sense of competitive spirit among the students to Tuli College. The award offers a cash prize of Rs. 5,000/- each to students securing First Division in BA Final Year Exam and Rs. 10,000/- each to students securing Top Ten position in BA Final Year Exam (Honours) under Nagaland University.

For detail information regarding admission process and online forms and prospectus contact

- Mr. Moa : 9612313903
- Mr. A. K. Ahmed : 8486490718

Sd/-
A.K. AHMED
Principal, Tuli College

Jhingan nem AIFF Men's Footballer of the Year naroküm agütsü



Chiteni/July 21, 2021 (Agencies): India football team nung defender Sandesh Jhingan nem AIFF Men's Footballer of the Year 2020-21 naroküm agütsüogo. Kasa mapang nung midfielder Suresh Singh Wangjam nem AIFF Men's Emerging Footballer of the Year 2020-21 naroküm agütsüogo. Asayar anaprongla ya club coach temi shima liasü.

Tang mezüngbuba Jhingan-i Player of the Year award agizükogo. 2014 küm pai Emerging Player of the Year Award agizüka liasü.

Iba naroküm agütsüba atema pa kanga pelaba lemsatapa Jhingan-i, "ISL aser I-League coach temi AIFF Men's Footballer of the Year 2020-21 ama shimba ya ni atema tetushi ulura. Iba naroküm ya tajungba inyaksü atema tajungshiba ka aser iba asaya jangrartem parnoki jangraba sülen

anidaktsü atema tajungshiba ka ama ni agir. Kü dak tamang katetba atema AIFF, ozü kibong, team-mates, support staff aser club level aser National level nung coach tem ajak dang kanga pelar. Tesayur ajak aser ni nongita yarirtem ajak dang maneni kanga pelar. Iba naroküm den külemi nüburtemi imlaba ama litettsü atema khuret dena arur," ta ashi.

Sandesh mezüngbuba Senior National Team nungi 2015 küm Guwahati nung asaya aser iba sülen pai tang tashi nung India team nungi 40 ben asayaogo aser goal pezü idaktsür lir. 2018 küm Intercontinental Cup akokba India team nung pa densema liasü aser 2019 küm Asian champions Qatar den goal kasasa nung tembangba asaya nunga pai shilem tajung agi.

Iba den bendenloksema pa lenisüba nung India team

ponguben asayaogo aser tesüsa Oman den March ita International Friendly ka asayaba mapang India team pa lenisüba nung asaya. Paisa, 2020 küm Arjuna Award agizükogo.

Kasa mapang nung arishi küm 20 tain Suresh Singh Wangjam, shiba taküm küm tetenzüklen mezüngbuba India team nungi asayaa liasü, pa nem Men's Emerging Footballer of the Year Award agütsüogo.

"AIFF Men's Emerging Footballer of the Year 2020-21 Award agizükba ya tetushi tulu. Ni kanga pelar. Iba naroküm agizükba ajanga küsasa dak tali tamang katettsü aser tarutsü nung takok tajung angutsü ajungmesotsü," ta Wangjam-i ashi.

Wangjam ya AIFF Academy cadet ka liasü aser pa 2017 küm FIFA U-17 World Cup nung India team nungi asayaogo aser I-League nung AIFF indang developmental club Indian Arrows nungi season ana asayaogo. Anibelem mesayui asayaba atema pa kanga nungtugu lir aser pai tang tashi nung senior national team nungi ponguben asayaogo.

Narokümtem atema takokertem ya Indian Super League aser I-League club coach temi shimmer.

"Naroküm agizükertem nem tenüngsang agütsür. Parnok tarutsü nung tashi taitba taitba tejakdangi aotsü aser parnok asaya yimya aser takok ajanga nisung aika ajungmesotsü imlar," ta AIFF tir Praful Patel-i ashi.

PCB-i central contract list sangdongogo

Lahore, Chiteni/July 21, 2021 (Agencies): Taoba Hokolbarnü, Pakistan Cricket Board-i 2021/22 season atema tebur cricket asayartem indang central contract list sangdongogo. Iba tentet (PBC) ajanga fiscal budget agizükba sülen, tebur cricket contract list sangdonga liasü.

Ita 12 atema sangdongba contract list, koba July 01, 2021 nungi June 30, 2022 tashi mapang süklakja lir, iba list ya panel kati renem. Iba panel nung International Cricket, Director, Zakir Khan; High Performance, Director, Zakir Khan aser chief selector Muhammad Wasim nung den captain Babar Azam aser head coach Misbah-ul-Haq dena lir.

Contract list, kong asayar 21 aliba asayar 20 kümstüogo iba list nung Mohammad Rizwan aser Hasan Ali naprongla category A nung denogo. Imran Butt, Shahnawaz Dahani aser Usman Qadir nung Emerging Category Contract nung aniok.

Category A nungi C tashi alur asayartem atema shilem 25 tashi tutsütsü, kasa mapang, Emerging Contract retainer tem shilem 15 tashi tutsüogo.

PBC indang Central Contract list nung temelenshi tem:-

* Category A nung tanaben anioker tem shilem 25 tutsütsü; Test, ODI aser T20I match fee metutsütsü.

* Category B retainer nung shilem 25 tutsütsü; Test match taa shilem 15 tutsütsü, ODI aser T20I match taa shilem 20 aser shilem 25 tashi tutsütsü.

* Category C retainer nung shilem 25 tutsütsü; Test match fee nung shilem 34, ODI den T20I match fee nung shilem 50 aser 67 tutsütsü.

* Emerging Category retainer nung shilem 25 tutsür; Test match fee nung shilem 34, ODI aser T20I match fee nung shilem 50 aser shilem 67 tashi tutsütsü.

Category A contract nung asayatsü maongka agütsüba sülen, 2020/21 season nung junga shilem agiba atema, Hasan Ali aser Mohammad Rizwan naprongla tanaben kasa jenjang nung aniokogo. Ano külen, Faheem Ashraf aser Fawad Alam na, shirnok Category B contract nungi asaya liasü, tenaprongla tanaben iba category nung aniokogo.

Mohammad Nawaz aser Nauman Ali naprongla Category C contract nung adentsü

maongka nguogo. Kasa mapang, asayar talisa Haris Rauf aser Mohammad Hasnain, shirnok taoba küm Emerging Cricketer List nungi asaya liasü, 2020/21 season atema tenaprongla Category C nung aniketogo.

Taoba mapang Pakistan cricket team captain, Sarfaraz Ahmed-a Category C nung jenjang ajanzüketogo.

Iba central contract list (2020/21 season) nung meshim alir asayartem rongnung Haris Sohail, Haider Ali, Imad Wasim, Asad Shafiq, Naseem Shah, Shan Masood aser Usman Shinwari nung densema lir.

* 2021/22 season atema Pakistan Men's Cricket Team central contract list:-

- Category A- Babar Azam, Hasan Ali, Mohammad Rizwan, Shaheen Shah Afridi

- Category B- Azhar Ali, Fawad Alam, Faheem Ashraf, Fakhar Zaman, Shadab Khan, Yasir Shah

- Category C- Abid Ali, Imam-ul-Haq, Haris Rauf, Mohammad Hasnain, Mohammad Nawaz, Nauman Ali, Sarfaraz Ahmed.

- Emerging Category- Imran Butt, Shahnawaz Dahani, Usman Qadir.

2032 Olympics ayongzüka asayatsü Brisbane shimogo

Tokyo, Chiteni/July 21 (Agencies): 2032 Olympics ayongzüka asayatsü atema Bodbarnü Brisbane shimogo. Tetokteper ka danga meli Olympics ayongzüka asayatsü atema IOC-i iba yimti shimogo.

2000 küm Sydney Olympics sülen küm 32 lir iba asayamung Australia nung ayongzüka asayatsü. Melbourne nunga 1956 küm Olympics asayaogo.

Asayamung takok ngua ayongzüka asayatsü onoki meteta lir, ta Australia Ato Kilonser Scott Morrison-i International Olympic Committee voter tem dang ashi.

2024 küm Paris nung aser 2018 küm Los Angeles nung iba asayamung ayongzüka asayaba sülen Brisbane nung asayatsü.

Tokyo Games nung IOC züngsemtemi telemteba ka magi tsüngda 2032 küm Olympics ya Brisbane nung asayatsü renemadoker liasü.

IOC-i February ita Brisbane

nem exclusive negotiating rights ka agütsü. Iba telemteba ajanga Qatar, Hungary aser Germany nungi Olympic ketdangsürtem bangkadaktsü, shirnok Olympics atema bit asütsü asoshi sentong yanglua liasü.

Brisbane ya bidding inyakyim tasenba akoker mezüngbuba lir. Inyakyim tasenba ajanga IOC nem candidates tem den tongteprateptsü aser tetokteper makai asayamung ayongzüka asayatsü atema yimti shimtsü tashi agütsür.

Iba inyakyim ya nüboyimba nung senotsü intokba tajemba kümdaktsütsü, IOC nem tashi tali agütsütsü aser vote alitepba nungi jenboa alitsü atema benokogo.

Olympic asayatem Gold Coast densema Queensland state kübok tesem balala nung asayatsü. Gold Coast nunga 2018 küm Commonwealth Games ayongzüka asayaa liasü.

Odisha FC head coach asütsü Kiko Ramirez shimogo



Chiteni/July 21, 2021 (Agencies): Indian Super League (ISL) club Odisha FC-i, asayamung season tibuba metenzük tsüngda club indang head coach mapa abentsü atema Francisco 'Kiko' Ramirez Gonzalez den tenangzükepba ka yangluogo

Arishi küm 51 tain Spain nung coach den küm ka atema tenangzükepba yangluogo aser season ka atema ano tenangzükepba atsülangshitsü lenmang lapoka yuogo, ta Odisha FC-i Mongolbarnü metetdaktsü.

Professional football asaya nungi anenba sülen Ramirez mezüng Spanish club Gimnastic nung 2002 küm assistant coach ama inyak aser iba sülen club youth team coach aküm. Pa 2010 küm Poble Mafumet nung aden aser 2012 küm tanaben Gimnastic-i meyipa aru.

Paisa Spain nung CE L'Hospitalet, CD Castellon aser CE Sabadell club nung coach mapa inyakogo. Maneni Spain first division league nung pa Nastic de Tarragona nung

tanabuba coach liasü. Pa bendanglen mezüngbuba Polish football club Wisla Krakow nung 2017 küm oa aden aser iba sülen India-i aru. UEFA Pro License bener aliba coach ya 2019 küm Greek professional club AO Xanthi FC indang manager liasü.

Ramirez ya Tarragona, Spain nung aso aser Gimnastic youth team nung mezüng asayaa tenzük aser iba sülen senior team-i aniket. Pa Spain nung Sabadell, Malaga, Ceuta, Cartagonova club nungi asayaba sülen asaya nungi anener coach mapa inyaktsü telemteba agi.

"Ni India-i arua Odisha FC nung inyaktsü yongya atar. Team tashi tait ka yangertsü atema meranga inyaktsü," ta Ramirez-i ashi.

Odisha FC-isa, 2021/22 ISL season metenzük tsüngda assistant coach aser head of football development asütsü Joaquín García Sanchez aniokogo.

Joaquín ya taoba mapang Valencia CF indang youth team coach liasü.

BILEMDANGANG

"Azümesenertem atema takoktsü mapa kecha mali."